

03 FEB 1999

Suruhanjaya-Abu Talib

BEKAS PEGUAM NEGARA AKAN SIASAT KECEDEeraan ANWAR

KUALA LUMPUR, 3 Feb (Bernama) -- Bekas Peguam Negara Tan Sri Abu Talib Othman berjanji akan melaksanakan siasatan ke atas kecederaan bekas timbalan perdana menteri Datuk Seri Anwar Ibrahim, semasa berada dalam tahanan polis.

"Saya akan cuba meneliti dari semua aspek," katanya kepada pemberita di pejabatnya hari ini.

Abu Talib, 60, ialah anggota suruhanjaya bebas penyiasatan untuk menyiasat kecederaan Anwar.

Suruhanjaya itu diketuai oleh Hakim Besar Malaya Tan Sri Anuar Zainal Abidin, anggota lain ialah bekas Hakim Mahkamah Rayuan Datuk Mahadev Shankar dan bekas presiden Persatuan Perubatan Malaysia dan pakar otopedik Datuk Dr Yeoh Poh Hong.

Abu Talib bersara pada 30 Okt 1993 setelah mengetuai jabatan Peguam Negara sejak 1980.

Abu Talib menegaskan peranannya dalam suruhanjaya itu adalah untuk mengetuai penyiasatan dan mendapatkan bukti.

Memberitahu para pengkritik agar membuat penilaian setelah suruhanjaya itu menyelesaikan tugasnya, Abu Talib berkata mereka harus memberikan suruhanjaya itu peluang untuk membuktikan kewibawaannya.

"Saya harap jangan 'pre-judge'. Nilai melalui prestasi kami.

"Rakyat akan menilai dan kami bersedia untuk dinilai, dan kami harus dinilai dengan adil," katanya.

Kenyataan Abu Talib itu berikutan dakwaan pembangkang dan kenyataan dalam Internet berkaitan kewibawaan Abu Talib dan Dr Yeoh sebagai anggota suruhanjaya itu.

Pembangkang mendakwa Abu Talib memusnahkan bahan bukti dalam kes melibatkan bekas Speaker Dewan Rakyat D.P Vijandran dan Dr Yeoh bekerja dengan Pusat Perubatan Pantai yang dimiliki oleh Mirzan Mahathir, anak Perdana Menteri Datuk Seri Dr Mahathir Mohamad.

"Saya fikir itu tidak ada kaitan, saya tidak mahu memberi ulasan," kata Abu Talib apabila ditanya berkaitan dakwaan itu.

Semalam, Dr Mahathir semasa menafikan dakwaan itu, bertanyakan jika ada bukti Abu Talib memusnahkan bahan bukti tersebut, sebagaimana yang didakwa.

-- BERNAMA

ES AHH RI